

四庫全書

集部

欽定四庫全書

集部

御定歷代賦彙卷三十五

詳校官檢討_臣劉 炘

主事銜_臣徐以坤覆勘

總校官編修_臣王燕緒

校對官中書_臣嵇承志

謄錄監生_臣張元功

欽定四庫全書

御定歷代賦彙卷三十五

都邑

鎬京賦

元 楊維禎

有西都賓問於北都主人曰昔宗周之經邑也眷我西
土實惟作京烝哉武王適觀厥成主人亦嘗聞其說乎
主人曰未也願賓摠懷土之素發思古之幽博我以王
道弘我以宗周賓曰唯唯夫姬德之興也始於后稷封

自邵土長於公劉克篤前祐去邵即幽躬服勞苦太王
肇迹艱難岐下國人懷歸從之如雨文王述業有此武
功既伐於崇遂邑於豐武集大統奄有四方遷都卜宅
於昔有光肇造區夏世有哲王受此丕基王配于京大
哉王之受命而都之也俯協白麟之符仰寤赤烏之禎
承以天命之眷正以寶龜之靈越豐水之東而宅是鎬
京實以繼十六王而始居開八百年之太平考其地勢
為古雍州為今京兆函崤二華之踞其左褒斜隴坻之

界其右終南太一之表其前洪河涇渭之帶其後天邑
亢爽惟神皋之所託上腴廣衍乃輿區之所受於是辨
方位建國鄙經歷九軌城隅九雉左祖右社面朝後市
翼翼巍巍四方所視若其五十封族八百分邦壯我屏
翰守我井疆維城磐石根深本強使天下輪運而輻輳
宜其繇世祚於久長想夫踰蹕之僚駕趨筵羽肅肅之
后駿奔踵武執珪執纁貢球貢紵九夷之長八蠻之主
賁賁聯絡膜拜偃僂楷矢求於肅慎獒獸獻於西旅紛

重舌而九譯僉來王而順序於時開明堂臨辟雍旒冕
密勿衣冠會同盛禮興樂於論鼓鐘庭實千品旨酒萬
鍾舞掉八佾歌洋洋九功漏澤霈甘雨仁聲逐祥風此鎬
京之盛槩而非曩日岐豐之可以比隆矣迨夫成王五
遷卜惟洛食土中是據土圭攸測風雨交會貢賦均適
協周召之經營朝萬方之玉帛遷殷頑兮是處務密邇
乎王室何艷鄙之復還固未忘於故邑既歷世之十二
念萬物之失生觀魚藻之興刺將不樂乎鎬京日嬖色

以自縱乃遂焉而逢殃吾已知宗周之不競而轍一東
於王城矣賓之言未已而主人喟然歎息曰客誠好古
之流歟惜乎信耳而遺目也予能知古昔之西京而未
知今日之北京也皇矣上帝求民之瘼大哉至哉乾坤
元德作我父母天開地闢乃眷北顧此維與宅蓋自帝
堯啓都召公拓迹慕容不能稱此土完顏不能據茲域
惟聖人之應符環衆星而拱極累列聖之洪基貽萬葉
之燕翼若其前滹沱後居庸雪山峙其西太行屹其東

拊上谷為脊脅控中夏為腹胃曾不恃乎巖險與襟帶
未足擬諸其形容蓋其光宅四表仁深草木厯開八百
狹周基之興龍形得百二悼秦關之失鹿八方士女同
后妃節儉之風萬里衣裳比公子仁厚之族故城郭之
大在無外之寰宇宮室之美在可封之比屋使漢京之
賦賦之而未盡雖周鎬之歌歌之而不足賓幸生乎元
世夫何信耳而遺目賓乃快墨不言懔然下意逡巡避
席謝罪而退

大都賦有序

元黃文仲

竊惟大元之盛兩漢萬不及也然班固作二都賦天下
後世誇耀不朽今宇宙昇平宜播厥頌文仲幸生聖世
獲覩大都雖不克效其贅牙之文繁艷之語亦不願聞
其奢靡之政浮誇之言謹摭其事撰大都賦上於翰林
國史請以備采擇之萬一其賦曰

有客以風雲為氣江海為量一蹈萬里顧盼伊壯嘗掉
鞅金陵鼓枻錢塘浮汴入洛西遊咸陽臨殘城之餘景

黯煙草其悲涼悲哉敗國之迹何必於此乎彷徨方令
天廓一宇地合八埏皇居帝闕新宅於燕萬方臣妾罔
不後先猶北辰之朝列宿東海之會百川今也不往白
首何年道齊魯以前邁歷趙魏而北轅亦既至止觀於
都內非雷而喧非電而奔懍兮恍兮殆失所存大都主
人目而招之曰子豈出蛙坎而望滄渤脫蟻封而覩瑤
崑者邪何神志不定四顧市人若將襲而問之也客曰
唯唯予行天下多矣獨此大都足不及履城闕之雄風

物之異幸子告我毋以為鄙竊聞燕之為壤古曰幽州
召公拓其規昭王闡其猷慕容據之以爭中夏完顏臨
之以朝諸侯名蹤勝跡萬歲千秋子能舉之否乎主人
撫掌而笑曰固哉客之問也彼小國一君偏方一主朝
盛夕衰何足以語維昔之燕城南廢郭維今之燕天下
大都宇宙千齡而啓運帝王一出而應符山川改觀民
物易居開天拓地自作制度豈輟人之軌而躡人之跗
我太祖皇帝之龍興也乘乾位王水德耀玄武撫璿極

鐵騎長驅金燼奄熄控扼南邦於焉駐蹕列聖相承有事疆場顧宮室其未遑日飭厲乎兵革世祖皇帝神聖武文既傳國以建號復紀元而書春操轡策而馭羣雄臨水火而救兆民授閭鉞者如靖如勣運廟謨者如張如陳有角皆崩無擾弗馴雨露所被知其澤風霆所至知其神是宅是圖以取以守恢皇基於億載隆畿制於九有因滄海以為池即瓊島而為囿近則東有潞河之饒西有香山之阜南有柳林之區北有居庸之口遠則

易河漚水帶其前龍門孤嶺屏其後混同鴨綠浮其左
五臺常山阻其右所謂子孫萬世帝王之業與海岳相
為長久者也迺樹厥墉乃鳩厥功畫萬址以效地連萬
雉而橫空高謂山兮何平長謂堤兮何崇闕門十一四
達憧憧蓋體之而立象允合乎五六天地之中前則五
門駢啓雙闕對聳靈獸翔題而若飛怒猊負柱而欲動
東華西華翼其傍左掖右掖夾而拱開厚載以北巡迤
邐乎行在之供奉內則宮殿突兀樓閣扶擁如峯之攢

如濤之涌瓦與天一色而瑠璃滑壁與霞爭光而臙脂
重宮宮堯堯縹縹緲緲金桷雕楹華桺彤櫺揭崇天之
扁於雲端卓鎮雷之竿於漢表奮角張牙衡脊鼓翼浮
動於蒼松翠檜之杪後則奇峯怪石巒巒屹屹異葩珍
藹檀檀藥藥紅者珊瑚青者琅玕亦肪其白亦錦其斑
中有虎豹犀象熊豕鹿猿鷹雕鷗鵠猛足健翰莫不承
恩被澤飛走乎其間又有西天比丘傳戒伏魔手繙金
字頭茸赭毛輦內昇酒鳴鼓吹螺居之圓殿為國護持

出入清禁莫之誰何上有廣寒莫於嵯峨聽政之暇憂
民之勞御步輦以臨幸垂天目於秋毫下引西山之淪
漪蟠御溝而溶漚經白玉之虹橋出宮牆而南逝以佃
以漁以舟以楫普為萬民之利聖人之心可謂至矣且
以一統之大四海之富非不能窮美而極麗固將昭恭
儉之先謀垂法則於後世也於是東立太廟昭孝敬焉
西建儲宮衍鴻慶焉中書帝前六官稟焉樞府帝傍六
師聽焉百僚分職一臺正焉國學崇化四方景焉王邸

侯第藩以屏焉神州赤縣首承令焉彬彬乎簪笏之林
古無此盛矣迺闢東渠登我漕運鑿潞河之垠塲注天
海之清潤延六十里瀦以九堰自汴以北者輓河而輸
自淮以南者帆海而進國不知匱民不知困遂使天下
之旅重可輕而遠可近揚波之櫓多於東溟之魚馳風
之檣繁於南山之筍一水既道萬貨如糞是惟聖澤之
一端已涵泳而無盡論其市廛則通衢交錯列巷紛紜
大可以並百蹄小可以方八輪街東之望街西髣而見

髣而聞城南之走城北出而晨歸而昏華區錦市聚四海之珍異歌棚舞榭選九州之穠芬招提擬乎宸居塵肆至於宮門酤戶何熒熒哉扁斗大之金字富民何振振哉服龍蟠之繡文奴隸雜處而無辨王侯並驅而不分屠千首以終朝釀萬石而一旬復有降蛇搏虎之技援禽藏馬之戲驅鬼役神之術談天論地之藝皆能以盡人之心而蕩人之魂是故猛火烈山車之轟也怒風搏潮市之聲也長雲偃道馬之塵也殷雷動地鼓之鳴

也繁庶之極莫得而名也若乃城闔之外則文明為舳
艫之津麗正為衣冠之海順城為南商之藪平則為西
賈之派天生地產鬼寶神愛人造物化山奇海怪不求
而自至不集而自萃是以吾都之人室無白丁菴無浪
輩累贏於毫毛運意於蓰倍一日之間一關之內重轂
數百交湊闐闐初不計乎人之肩與驢之背雖川流雲
合無鞅而來而隨消隨散杳不知其何在至其貨殖之
家如王如孔張筵列宴招親會朋誇耀都人而幾千萬

貫者其視鐘鼎豈不若土芥也哉若夫歌館吹臺侯園
相苑長袖輕裾危絃急管結春柳以牽愁佇秋月而流
盼臨翠池而暑消褰繡幌而雲暖一笑金千一食錢萬
此則他方巨賈遠土謁官樂以消憂流而忘返吾都人
往往面諛而背訕之也言其郊原則春晚冰融雨霽土
沃平平縣縣天接四目萬犁散漫兮鴉點點千村錯落
兮蜂簇簇龍見而凍根載茁火出而早薺漸熟柳暗而
始蒔瓜棗花而猶播穀栽草數畝可易一夫之粟治蔬

千畦可當萬戶之祿寒露既零雄風亦多率婦子以刈
鉅憂氣候之蹉跎來輶去轂如亂蟻之潰殘垤千困萬
庾若急雨之漚長河爰滌我場其樂孔多有門外之黃
雞玄隼與沙際之綠鳬白鷺收霜菜以為菹釀雪米以
為醢社長不見呼縣官不見科喜豐年之無價感聖化
而謳歌嗟夫飢者帝食之寒者帝衣之居者帝安之亂
者帝治之中統之深恩至元之厚惠民之思之庸有既
乎矧我皇上續二世之鴻烈紹六世之宏基明侔乎兩

曜令信乎四時惠顧下土載謀載惟謂一農不遂其耕
則四民或受其飢傷我畜者虎狼害我苗者鹿麋每歲
孟春親御六飛南臨漫衍大獵乎潞水之潞萬騎分馳
霆奮飈發弦鳴禽落網動獸蹶百驚舉層雲裂羣獫奔
歲草絕飛者委毛走者僵血虞衡奏功天子乃悅匪耽
意於遊畋將講武以蒐閱畢獻禽而行賞迴翠華而北
轍遂幸上都避暑於朔慮牧畜之妨農逐水草於廣漠
雲螭以南既芟既穫徐擁輿衛母俾民虐千官領至羣

樂大作天子之心為民而樂彌畿甸之千里悉扈駕之
部落維牛維羊維馬維駱貧民以百計富者以千約民
之五雞二彘何遼邈哉由是慶區宇之昇平彰穹昊之
明貺嚴聖心之翼翼爰潔備乎祀饗道流間南北之音
釋子雜蕃漢之狀步虛而歛鸞鶴演樂而供獅象穆穆
在前赫赫在上非沈非甲而在乎明德之馨香於戲列
祖造之聖主保之賢臣佐之兆民好之上帝無私善必
報之故詩以太平為萬年書以皇極為五福天人相與

之際殊無奇術異道也猗歟盛哉大都之事何可勝紀
吾網提而領挈之使爾啓聲而聽刮盲而視嘗鄙夫二
都之賦蟲魚草木何太瑣細吾若效之將與子談三月
而不止客曰然醯人誇釀酒人誇釀母怪乎當時之士
好鼓舌而搖脣古我帝王自冀至洛惟以都名漢唐東
西因以方名吳蜀魏汴咸以地名今名以大誇孰甚焉
主人變乎色曰爾言過矣豈謂鴻之翮而猶鵬之翮蜥
之鱗亦猶龍之鱗邪大之為義無匹無倫非我皇上之

德疇克當之汝復坐而聽我所云帝不爭土王始制地
始焉萬國終焉七氏畿封之內會盟戰誓自君自長何
有於天子厥後能統一者秦漢晉隋唐而已西至乎玉
關東至於遼水北至於幽陵南至於交趾得縱者失橫
有此者無彼大哉天朝萬古一時淶江成血唐不能師
今我吏之遼陽高麗銀城如鐵宋不能窺今我臣之回
鶻河西漢立銅柱馬無南蹄今我置府交占雲黎秦築
長城土止北陲今我故境陰山仇池馱古螺髮虜面雕

題獻藝效馬貢象進犀絡繹乎國門之道不出戶而八
蠻九夷謂之大都不亦宜乎客曰博哉予之所言上周
乎乾下括乎坤故能獨高萬古而號曰大元於是主人
曰未也爾知其大未知其所以大是猶遠望巨峯而不
見其址近覩長江而不見其源吳起不以西河為美而
德其美婁敬不以洛陽為安而德是安況巍巍蕩蕩之
境必有強其本而壯其根者也且夫陳主歸隋周王入
秦山陽祖送萬古悲辛惟我國家待降以賓藐江南之

趙孤能納土而稱臣既寵之以封爵復全之以終身彼南巢之故猶有慙於古人孰大乎吾天子之仁元封殫力西南之墟貞觀暴骨東南之土一人逞欲萬姓何苦惟我國家止戈為武謂荒裔之民得之不利於用謂贅疣之地取之不益於富罷橫海之戈船但遣使而存撫彼有苗之誓猶且蹂於師旅孰大乎吾天子之恕羽林象天之儀衛梨園傳月之音樂帝皆是却不警不蹕從百僚之控鶴何其然也舜德之大臨下簡也江都錦繡

亦可報也織坊爛霞之金繡局委雲之茸帝不是用以彰美吾聖躬何其然也周德之大在位儉也商臺玉衣亦可念也惟我聖皇五輅不乘八鸞不駕雨則獨乘象輿霽則祇御龍馬何其然也念我烈祖鐵衣雨汗弗敢安也神禹之大胼胝四載思艱難也惟我聖皇奉坤母建隆福正事御構五華宮不為廣殿不為奢何其然也念我先皇居數十年弗敢改也唐堯之大土階三尺防驕泰也若乃國之大寶惟忠惟亮聖皇思之是崇是尚

可官也不以勲門不以世賞可擢也或賈或術或伶或匠開東閣者載搜載訪寧不起膠鬲於魚鹽拔百里於廩養國之大鑑惟天惟祖聖皇奉之是惕是懼瞻彗象則宥刑聞水旱則蠲賦百官貢香如帝親舉祇見宗廟俎豆鐘鼓彌天浮屠浩不可數普閱法藏幣帛金楮變陰陽者載佐載助寧不覩景星而瞻慶雲酌醴泉而飲甘露國之大柄惟賞惟刑聖皇操之是重是輕或錫之黃白予之土田而賜之服乘非必大功也以一技一善

亦人之所能或釋之桎梏免之斧鑕而周之金繒非必
大惡也以一形一氣亦人之所生掌邦典者持權而視
衡寧不陋敝袴之韓侯隘不赦之孔明國之大本惟民
惟社聖皇憂之靡夙靡夜勞矣哉遣問疾苦困矣哉詔
卹矜寡庶獄繁哉宥之以洗冤貪夫毒哉戮之以懲下
居郡國者承流而宣化寧不歌康衢之謠播行葦之雅
至若親親也則諸王鞏磐石之宗分邊戍總兵戎老老
也則大臣忘祖帳之送奉朝請食鼎鐘柔遠也至簡至

易亶明亶聰大綱既舉大化亦洪將胥慕於稷契孰肯
附於鯀共丕顯哉聖皇之德日盛日隆前乎百世不得
軌其步後乎百世不得踵其蹤惟其有大德之大故能
成大元之功惟其有大元之大故能成大都之雄客曰
問一得三云胡不喜惟茲三代孰得而比主人曰詩不
云乎維其有之是以似之夫元者天地之苞也德者天
地之美也都者天地之會也微天地之大孰能比於此
哉客起而歌曰天其玄兮地其黃兮維此大都統萬方

兮天其生兮地其遂兮維此大德囿萬類兮天其高兮
地其厚兮維此大元齊萬壽兮恭望闕庭頓拜舞蹈而
退

皇都大一統賦

有序

明

金幼孜

洪惟天朝太祖高皇帝誕膺景命龍飛淮甸既渡大江
遂都金陵撫有區夏肇造洪基以開萬世太平之業逮
我皇上繼承大統克紹丕圖仁恩誕敷聲教洋溢雨暘
應期民物阜蕃薄海內外罔不率從而自蒞祚以來宵

肝拳拳惟思所以繼志述事以承太祖高皇帝之意於是倣古制肇建兩京以為北京實當天下之中陰陽所和寒暑弗爽四方貢賦道里適均且沃壤千里水有九河滄溟之雄山有太行居庸之固玉泉之流經緯乎禁藥之中碣石之壯盤踞乎畿甸之內故其山川之壯觀風氣之清淑真有以卓冠四方為萬國之都會誠帝皇子孫萬萬世太平悠久之基由是敕令官汨内外文武百執事經營於茲而凡民庶士卒工匠之流莫不駿奔

子來趨事赴工罔敢或後遂至天意人心感孚和同靈
應疊臻嘉祥屢薦不數年間厥功告成而宮闕府庫之
宏壯郊廟社稷之嚴肅朝市民物之鉅麗秩乎其有序
井乎其具列蓋自古先帝王都邑之盛未有逾於此者
乃永樂辛丑春正月朔旦皇上御奉天殿大朝海內文
武羣臣四方蠻夷酋長率皆在庭踴躍鼓舞以為皇都
之奇麗若此誠曠古所未見而未有者而所以為皇上
萬壽之徵宗社磐石之固聖子神孫寶祚綿延之慶皆

兆於此矣何其盛哉臣幼居禁苑職業文詞幸際昌期
躬覩盛美謹鋪張為賦以彰太平之偉烈且以昭示於
無窮其辭曰

維太祖之受命膺上天之禎符奮布衣於淮右提一劍
而長驅乃翦夷於羣醜悉蕩滌於寰區既渡大江金陵
是都虎踞龍蟠興王之居爰啓鴻業肇開皇圖振光華
於曠古恢萬世於弘模繫我聖皇祇膺寶厯奉天勤民
太祖是式恩覃九圍仁周八極雨暘應期民物豐植觀

四方之清寧乃有念於京邑維此北京太祖所屬天造
地設靈鍾秀毓總交會於陰陽盡灌輸於海陸南臨鉅
野東瞰滄溟西有太行之截嶺北有居庸之崢嶸瀉玉
泉之逶迤貫金河而迴縈瓊島上聳以盤礴太液下澈
而泓澄將繼志而述事必於此而經營乃敕羣工乃命
百職萬方子來效勤殫力萃四海之良材伐南山之鉅
石感恩意之昭孚戒經營而弗亟於是天心協順靈應
彌彰布輪囷之卿雲發璀璨之祥光醴泉湧其浩浩甘

露下其瀼瀼赫萬靈之呵護藹瑞氣於穹蒼乃卜良辰
乃蠲吉日以相以度以構宮室棟宇崇崇簷楹秩秩以
蓋以覆陶冶埏埴以繪以圖黝堊丹漆煥五采之輝煌
作九重之嚴密天地洞開馳道相連金鋪絢日玉柱凌
煙星羅碁列壁燦珠聯虹飛霞擁龍翔鳳騫超凌氛埃
壯觀宇宙規模恢廓次第畢就奉天屹乎其前謹身儼
乎其後惟華蓋之在中竦摩空之偉構文華翼其在左
武英峙其在右乾清並耀於坤寧大善齋輝於仁壽豁

千門之雲矗敞萬戶之輻湊至若丹闕巍巍飛觀凌空
觚稜上聳閣道遙通左祖右社蔚乎穹窿有壇有壝有
寢有宮亦有天地以嚴其崇復有石渠天祿以蓄圖書
玲瓏綺錢照耀文疏懸牙籤之萬軸列緗帙之紛如宛
奎壁之宵映燦黎燈之夜噓瀛洲文學之士閭苑列仙
之儒備顧問於朝夕咸欽仰於聖謨又若大庖光祿列
乎西東珍羞駢羅玉食惟豐禁城之下金水溶溶畫棟
凌雲繡柱含空璇題耀日綵橋駕虹雕甍隱映寶殿玲

寵太孫所居諸王之宮金枝玉葉照耀層空育德講學
宴適遊從若夫御苑逶迤上林深窈有山有泉為臺為
沼巖谷谿谷雲霞縈繞走有奇獸飛有靈鳥樂寬閒以
棲息恣回翔以馴擾復有天閑十二駿骨軒昂渥洼神
龍之種大宛名駒之良並權奇而雄傑或磊落而騰驤
又若廩庾輪囷惟萬惟億豐歲所儲累世之積玉粒金
稃露積充溢國用所資人足家給復有武庫巍巍戈矛
森列旗幟搖雲鎧甲耀雪凜凜白旄差差黃鉞四征不

庭以彰九伐奮軍聲之揚揚振皇威之赫赫又若內帑
充物寶藏紆餘奇珍異產海匯河輸夜光之璧明月之
珠琉璃翡翠瑪瑙珊瑚車渠琥珀火齊璠璣錦繡迺
羅綺芬敷又若百司庶府有綱有目文武頡頏為國鈞
軸太學郡庠之並建琳宮梵宇之森矗列九衢之坦坦
引六街而相續閭閻櫛比闐闐雲簇鱗鱗其瓦盤盤其
屋馬馳聯轡車行擊轂紛紜並驅雜遝相逐富商巨賈
道路相屬有貨填委丘積山蓄又若歌樓舞榭豔態穠

妝羅袖迴雪清聲繞梁管絃嘔啞狎坐傳觴娛青陽之
麗景駐白日之飛光雖小大之不遺仰制度之畢備斯
皆聖智之籌謀實出宸衷之經緯儼氣象之一新壯規
模於萬世屹鴻基之豐隆偉山河之巨麗貽子孫以嘉
猷紹先皇之初志邁豐鎬之舊規軼漢唐之遺制於是
厥功告成慶叶天人乃歲辛丑維孟之春王正之月朔
旦良辰聖皇臨御大朝羣臣内外文武濟濟彬彬戎狄
蠻貊工商士民稽首嵩呼抃舞歡欣筐篚具列方物畢

陳以饗以醑洽此皇仁大一統而無外藹至和於八垠
臣忝詞垣叨職文字懷眷寵之彌深愧涓埃之無補際
千載之良逢幸微生之快覩傳盛事於將來奚往牒之
足數祝萬壽於萬年播皇猷於千古

皇都大一統賦

明楊榮

維皇明之有天下也於赫太祖受命而興龍飛淮甸風
雲依乘恢拓四方弗遑經營既渡江左乃都金陵金陵
之都王氣所鍾石城虎踞之險鍾山龍盤之雄偉長江

之天塹勢百折而流東炯後湖之環繞湛寶鏡之涵空
狀江南之佳麗匯萬國之朝宗此其大畧也迨於聖皇
嗣大一統剛健日新聰明天縱囿四海以為家登羣賢
而致用思繼志之所先惟都邑之為重於是天意鑒觀
人心和同神靈效順龜筮協從既應天以順時爰辨方
而正位視往聖而獨超繼高皇之先志乃相乃度載經
載營眷茲北京山川炳靈其為形勢也西接太行東臨
碣石鉅野亘其南居庸控其北勢拔地以崢嶸氣摩空

而窮劣復有玉泉漫流宛若垂虹金河澄波雪練涵空
膏渟黛蓄浩渺沖融包絡經緯混混無窮貫天河而為
一與瀛海其相通爾其派連析津源分潞水既環抱以
縈迴亦瀾茫而清泚來職貢於四方通檣帆於萬里至
若王畿之內輦轂之間沃野彌望原陸寬閒煙火相接
雞犬相聞宵無警柝外戶不闔以牧則蕃以種則穫以
佃以漁以耕以鑿隨其所營皆得其樂而其為都也四
方道里之適均萬國朝覲之所同梯航玉帛為都邑之

會陰陽風雨當天地之中爰敕臣庶爰伐材木南浮湖
湘西入巴蜀斧披虹霓聲撼山谷徂徠之儲新甫之蓄
梗桷杞梓杉櫨檉楠梢橫青天根連地軸鉅細畢輸長
短悉錄駕雲車之百輛振龍驤之萬斛紛紜輻輳彌布
川陸厥材之良不一而足若乃美石比玉從古所稱瑩
者如圭潔者如瓊溫者若璐潤者若瑛以磨以礱乃堅
乃貞鏗林振壑馳飆驚霆千夫所攻萬里啓行山靈助
其光華坤后發其精英豈砮砮之敢混實寶玉之爭呈

若夫坎離播功坤艮合德出於陶冶成於埏埴飛紫馱
於半空結祥煙於八極或規以圓或矩以方燦琉璃之
一色耀文采於中央或肖形於獸吻或擬質於鴛鴦於
是良時載啓吉旦既卜臣庶駿奔瀚若雲蟲源源其來
登登其築百堵皆興萬夫相屬行若魚貫立若鱗鬣斧
斤揮霍尺度攢簇由是賁育效力公輸獻奇曰爰曰斯
伯與暨垂攄厥巧思運厥神機各效其能以見於為顧
小善之並錄矧妙伎之或遺羣材硯磊以山積鉅棟騰

躍而翬飛爾乃九門洞開三殿攸建觚稜雲聳丹漆霞
絢輦路逶迤閣道迴轉華蓋屹立乎中央奉天端拱乎
南面其北則有坤寧之域乾清之宮璇題耀日寶柱凌
空金鋪璀璨綺疏玲瓏珠玉炫爛錦繡丰茸歲蕤起鳳
天矯盤龍千門瑞靄萬戶春融其南則有午門端門左
掖右掖丹闕峙而上聳黃道正而下直豁大明之高張
屹正陽之拱揖繚周廬之穹崇蔽重甍之護翼其左則
有宗廟之祀以奉祖考仰在天之神靈隆萬古之尊號

謹歲時之烝嘗薦純誠於蘋藻其右則有社稷之靈以
崇祀享汎壇壝之肅清通神祇於肸蠁爰春祈而秋報
用昭荅於靈貺若夫乾清之前門列先後日精月華之
對峙景運隆宗之並構謹身翼乎其前仁壽屹乎其右
又有奉先之祠大善之殿文樓武樓之特聳左順右順
之並建若乃震位毓德文華穹窿亦有武英實為齋宮
有天財寶藏以貯珍貨有大烹光祿以典殮饗寶善在
左以翼翼思善居右而崇崇若夫欽安之後珠宮貝闕

藻繡交耀雕龍截窠六宮備陳七所在列親蠶有館繅
絲有室二南詠歌播於篇什輔德相承風化洋溢皇城
之外殿宇魁渠有翼有嚴太孫之居金水之濱瑤階玉
除梁棟巍巍上凌太虛為諸王宮翊衛皇圖星羅棊布
以臨九衢至若文淵之閣祕書之府纂述乎今儲蓄乎
古汗牛充棟莫知其數牙籤迺邈緗帙旁午燦奎壁之
上連赫虹霓之夜吐若夫飛閣戕戕實為承天繡楹霧
簇畫拱星聯踞石猊之盤礴聳華表之歸然至若南郊

之設特超古制園丘方澤不岐以二合祀於中父母天
地壇分内外二十有四羣祀有典百神有位惟我太祖
實配上帝乃歲孟春三陽之始吉日斯蠲祀事有備薦
以粢盛泛以醴齊豆籩秩秩庭燎晰晰鼓鐘戒嚴鑾輿
至止儼對越以升中祝蕃禧之攸萃至若山川有壇先
農有祀馬祖旗纛各以時祭寅畏恪恭罔有弗至若夫
稽古建官為民之牧内外相承各率其屬至若黃門給
事青瑣仙班典内庭之封駁近咫尺之天顏復有文翰

之林詞藝之苑處嚴密之清禁列英華之妙選優游玉
堂之署出入金鑾之殿擅瀛洲之美譽承黼展之清問
至若鳳池之職尚寶之司掌絲綸於紫誥典符璽於彤
闌有宗人以統天潢之派有銀臺以通喉舌之機若乃
六卿分職位躋台鼎贊廟堂之謀謨總藩方之政令至
若憲臺之任風紀是司誠耳目之所寄實法度之攸施
若夫都府有五軍政是宣奮貔貅之將士耀霜雪之戈
鋌保圖輿於安堵埽絕漠之烽煙至若都邑有庠辟雍

有學育才於茲以儲以擢若夫容臺典祀士師明刑錦
衣總夫儀衛巡警係於五城鴻臚謹朝謁之禮太僕司
監牧之名京畿布列於州郡田野參錯於屯營至若奉
神有祠報功有廟梵宇琳宮光輝朗耀倉廩之積如坻
如京露積紅粟陳陳相因鎧甲晶瑩士卒精銳靡強弗
摧靡堅弗碎駢駟騏驎裊驕驕宛冀之駿渥洼之良
充乎內廐磊落騰驤又有福山後峙秀出雲烟實為主
星聖壽萬年層嶂疊擁奇峯相連鼓鐘有樓其高接天

勢若貫珠萬里絲延若乃朝市既成井邑斯列閭閻輻
輳闐闐有截豁九達之通衢羅萬室之如櫛富商巨賈
肩摩袂接北通朔漠南極閩越西跨流沙東涉溟渤來
百貨之縱橫雜輪蹄之填咽珠璣爛其輝燿羅綺燦其
騰沓至若青樓並峙綺榭相連妖姬窈窕豔女嬋娟穠
妝競倚粉黛爭妍引歌喉之宛轉迴舞袖之踟躕極酣
嬉於暇日窮勝賞於芳年至若太液之池萬歲之山澄
波激豔層岫巔坼開闔蔽虧縈帶迴環竦飛樓於掩曖

敞貝闕於巖端門臨碧鮮之磴橋架玉虹之灣晴光出
乎軒檻飛翠灑乎闌干瞻廣寒之月殿撫桂樹之團團
爾其瑶草龍蔥琪樹累歷長松之盤古柏之直脩篁煙
挺老檜雲積瑰偉之姿奇異之植翦然其陰嫣然其色
宛蓬瀛之在茲恍塵凡之遂隔至若上林衍沃靈囿透
迤瀦以碧海湛以深池百草綠縹羣卉芳菲寬閒薄乎
禁禦平廣屬乎坤維樂鱗介之游泳縱毛羽之襍糝乃
有騶虞效祥麒麟表瑞白質黑章麋身牛尾神鹿貢於

遐方白象出於南裔倏玄兔之繼呈忽天馬之沓至復
有馬哈福祿厥獸殊形駝雞之異白鳥之禎奇姿詭態
率舞縱橫隸首莫紀伯益難名至若地祇協順天心昭
格嘉祥疊臻靈貺蕃錫神木不運而自行祥氛煥發於
巨石忽靈蛇之前導現大青於沙磧瑞光煜乎半空卿
雲縵兮五色醴泉湧兮瓊漿甘露滑兮玉液靈芝產於
碧山景星見於南極禿干兔以難窮殫百喙而莫悉然
而歷觀前代迄於往古帝王所都難可畢舉豐鎬之美

崤函之固宛洛之奇汾晉之富雖或雄據於一時控馭
於中土而於今茲帝都之壯麗又豈可以同年而語哉
迺歲庚子告成厥功辛丑正旦方春和融聖皇御寓萬
方會同百辟卿士肅肅雍雍蠻夷戎狄罔不率從戴白
之叟垂髫之童且欣且忭拜舞呼嵩仰祝聖壽萬福來
崇慶此皇都佳氣鬱蔥擴基圖於萬世偉壯觀於九重
真帝王悠久之業據山河表裏之雄然而聖天子以六
合為家以四溟為池以仁義為干櫓以禮樂為藩維不

恃險以為固惟在德之所施至和塞乎穹壤恩澤洽乎
華夷致九有以寧謚躋萬國於雍熙此其所以德侔乎
堯舜道合乎軒義窮天地亘古今而莫能與齊也臣職
禁垣叨蒙眷顧謏陋是慙涓埃莫補覩皇都之巨麗壯
宏規於往古潔泓潁於長辰陳盛事以為賦又從而為
之歌曰翼翼皇都萬方之會兮聖德之宏實同覆載兮
聲教所暨一統無外兮又歌曰皇都翼翼民之所止兮
惟皇萬壽福祿無已兮聖子神孫寶祚萬世兮

皇都大一統賦

明 胡啓先

若有儒生小臣好古耽文遠稽虞夏商周之載籍近閱
秦漢唐宋之遺言於是歷冀亳而覽豐鎬睇咸陽而望
長安仰東西兩京之制於往昔觀南北二京之壯於今
日載閱淮濟載涉河易爰盼太行爰俯碣石顧并營以
徬徨履滄薊而踽踽觀於都城則氣象弘廣即夫山川
則形勢雄壯其物產之利素豐饒其人民之俗尚義讓
乃上天之眷命而聖人之化成實在於斯故我朝肇建

皇都而天下一統宜在於茲邪方歎慕而未已若惝恍
而何之迺有先生長者雍容怡愉邀坐而問曰吾聞登
山者必即其崇岡涉海者必測其汪洋今子遊觀於皇
都能舉其大綱乎願聞其說生曰唯唯生雖不敏請陳
其槩夫四通是交八達所會水走舳艫陸奔輶載星拱
萬國囊括四海其宮闕則奉天華蓋謹身三殿以正位
乎外乾清坤寧兩宮以正位乎內位夫西則武英為宴
居之密位夫東則文華為繼體之大其尊卑以天地為

法象其交構與陰陽相合配駢集夫杞梓之材文彩夫
玄黃之績既觀天而穹窿極盤地而磊塊民庶咸子來
工師呈巧最實所謂華美而不奢泰者也其都城方廣
萬雉弘闢九門建樓設閣通道達闕晨鐘暮鼓更別漏
分士夫林立而商賈雲屯者也先生曰此特宮闕城郭
之美而已願更其辭於是生復請曰今之皇都古為冀
州伊洛距其前恒嶽倚其陬環西山而作城界東海以
為溝羈梁雍而絡青兗控戎貊而御吳甌凜江淮以共

注引河濟而北流即金臺瓊島之可登望撫太液盧溝
之可泳游阻居庸古北以為關則遠人震懾闢趙魏齊
魯而成衢則侯甸來朝故宜帝皇之都而為萬世之良
謀此太祖之所以創業而皇上之所以闡皇猷也先生
曰此亦山川形勝之槩而已願悉其大於是生復請曰
地土肥腴千里夷壤良木冬榮嘉禾夏長松柏檜樟梨
栗棗橡成林叢生干霄直上黍稷稻粱桑麻菽粟豐年
蔽野暢茂接屋一夫所耕十夫是足一歲所獲三歲之

蓄於焉充棟而資廟廊供粢盛而具廩祿也又有珍禽
異獸則若鷹鷂鴻鵠熊猿雉兔虎豹麋鹿翱翔郊藪馳
驅林谷隨取而獲應捕成觸於以備畋獵而具蒐狩供
宴饗而資庖肉也先生曰地利之美可以養人而非所
以成化者也於是生復請曰方今四海一家萬夫同志
典文治者咸舉夔稷契之徒任軍旅者悉呂召孫吳之
類故六卿協衷而五軍整勵加之居藩鎮者各恭厥職
處守令者咸敬乃事是以郡禮樂而邑詩書家和睦而

人孝弟農樂耕稼士懷忠義商通貨財工精技藝梯航而來襁褓而至也先生曰子知所以化及於人者然猶未推夫所以受命於天者也於是生復請曰陰陽調和四序順理雨暘以時寒暑應氣慶雲見乎天醴泉出乎地麒麟貢而鳳凰來龍馬獻而獅子至以及景星甘露之祥芝草嘉禾之瑞白象玄兔之奇素鳥鸚鵡之異白皇上續大統基皇圖以來莫不駢臻而畢萃於以見上天眷命之隆而帝皇萬世之兆基於是也先生曰子知

天命之所在然猶未究夫感化天人之大本也於是生
乃再拜而復請曰維我皇上聖神文武德合天地道貫
今古其繼天立極與伏羲軒轅同制度也其化成天下
與唐虞堯舜合規矩也其順天應人與商湯周武協呂
律也故宜建宮城以為居保山川而自固因地利之豐
盛獲天人之順助為天地之君師作萬世之父母尊居
天位安享國土言未既先生大笑而語曰斯言盡之可
書以為皇都大一統賦

皇都賦 有序

明 董應舉

昔宋人有作汴京清明圖者寓思頗遠穆乎有豐豫之
警國家定鼎金陵成祖改卜取象北極蓋示星拱之義
兼以迫壓異類顯揚威靈有警則烽火易傳地近則號
雷易震赫哉聖謨奠於世世矣侍御某公深得此意繪
之縹素名曰積勝予反覆流覽仰聖神之無競見皇圖
之有奕撫卷吮毫不覺媿媿夫豐水貽謀商邑建福商
周諸君子之所侈揚也上林三都亦極才人之致予雖

才謝昔人而意各有為豈曰侈目飾觀曼靡蕩志云爾
其辭曰

伊昔建邦實重上游扼險百二環顧中州漢鼎西奠宋
襲東周強弱斯判圖大其謀惟我國家開天闢地始基
於南亶其北旆天啟北土乃殖乃昌收虞都之疆跡應
箕尾之靈光天則有樞皇則有宅汎六百年之氛翳奠
億萬載之丕則控沙漠之絕域憑滹河之橫駛枕居庸
標碣石左環滄海右擁太行鸞峙鳳翥翼其有京前則

涿鹿蛇衍黃帝之所戰蚩尤也後則追貊倚薄召公之
所奄北國也蝕於元遼集於天邑纏日月之綺纚屹宇
宙之軒廓臨制八方揮慶六幕於是定鼎凝命正離燕
翼卜郊立社經野建極闢四墉開萬雉黃道周亘紫垣
闕恤鎖玉柱以擎天截金題之炫日欽岑迢遞截窠盤
躍奇端門之太極耦乾坤之清寧文華武英論道承明
亦有離宮別寢閒館崇臺環列星布棊置叢排顯靈祈
祥奉先思孝皇極秉躬東宮啓後長樂鐘聲昭陽樹色

椒房掖庭璇廬祕室亦有芳林茂苑少海蓬萊移天河
於太液儼星渚之滌汨隱栖龍之綽約矯射鴻之崔嵬
流覽目窮圖畫心額外則百司庶府萬井千廛朱甍夾
道甲第雲聯列肆霧織蹂轂摩肩沓沓璘璘橫貫層巔
則有游士飄纓任俠說劍擊筑快心市駿流羨月滿青
樓仙游奇甸角刺僧廬浮屠隱見五方輳集萬貨波薦
炫目薰心貞夫志變亦有殊方重譯通道造庭東則朝
鮮句麗南則牂牁夜郎西則無戈月氏北則擊鞬烏桓

各以方物來享來王則有歲星之獸疏勒之獅騶虞繡
虎玄豹號犀觸邪獬廌騶駼駝翠鸞孔雀丹鳥奇毛
又有霍山之玉大宛之珠魚腹之璜驪頷之寶鼉文珊
瑚木難火齊寶布象簞錯落照耀斯慎德之所招實綏
柔之明效也乃若重關屹嶢川原衍盈亭館相屬牙孽
相乘則有侯門尹子抱關侯嬴授管秉籥望氣占星奉
使出狩之軒分符弭節之車鳧羽飾翠雲霓結旂曳棼
星於落日綴明月於圓規走盧溝之危梁馳綠楊之琉

璃片如電激疾若飈分應接不暇往來繽紛或解韉而
偃息或望塵而載奔或風塵而襲或道汲而泉或負錡
而牧或饁餉而田或倚樹而嘯或荷鋤而眠見稼穡之
艱難知民食之所天至若輦金輦壁鼎肩振颺黃封百
道滕鐫千箱蹶馬仆車咽路轟岡椎膏吸髓塵蹟上方
或鑿山而挑禍或航海而遺殃豈共球之所入盡貂璫
之搶攘夫世無勤而不治欲無極而不荒地無大而不
圯心無小而不昌雖累洽於列聖亦虞損於復隍嘗試

登高山望紫塞按圖記列職方居庸紫荊山海遼陽去
京師其幾許時業爰於疆場蓋有永樂三犁宣德喜峯
銘功瀚海天壤無窮英北狩而來復肅城守而張皇貢
市成而甲鈍犬羊飽而敵強吾安知夫戎馬之不郊櫬
槍之不芒甘泉燧而警漢渭橋薄而迫唐於是皇帝惕
然思蹶然作奮然坐廟堂朝方岳闢四門進韜鐸祠郊
廟御講幄警桑杜勤錢鏐飭邊防強戎索發內帑以犒
士拔英雄而圖略收出虎於檻阱還埽除於閭閻實閭

閭惠中國歌舜絃之薰風舞堯階之千籥保金甌於無
虞紹祖烈宗功於燦灼將駕三五軼百王垂萬世等乾
坤豈漢鼎唐基所可尺量而尋度也亂曰天地昏蒙日
月揭兮太行剡剡天造設兮襟海帶河背則碣兮四百
重歸胡運竭兮建以為都皇則哲兮衆星所拱九有截
兮萬國共球辰其轍兮定鎮玄冥驅胡孽兮殫威振靈
復芽孽兮犬羊不常誰能絜兮庚戌憑陵城岷隍兮糾
糾干城誰為傑兮守在四夷三五軼兮郊馬不生泉冽

列兮貌虎百萬狼煙絕兮曰慎德而修備萬世子孫金甌永無缺兮

大明一統賦

明 莫旦

昔者宋社既屋胡元乃興政乖教弛谷穢風腥延及季世四方不庭干戈擾攘盜賊縱橫彌勒鼓亂妖言煽驚或托香軍為號或假前宋為名或稱白蓮或號紅巾楚有陳而吳有張毫有韓而蜀有珍大豪小猾僭主假君蛾屯蟻聚鴟張獍鳴是猶衣垢敝而叢虱肉腐敗而多

蠅嗟哉元元困於爭戰威重命輕令嚴膽顫血流漂杵
屍積攢箭鬼神夜哭彗孛晝見海溢山崩天鳴地震蓋
九十年矣誠天地古今之大變也於是天生真主奮跡
田里兆應瑞雲符乘王氣虎嘯而風龍興而雨將相協
心弔伐斯舉左黃鉞而右白旄前兵車而後甲士六丁
五神之呵護九宮八門之形勢策全器良天時地利攻
殺擊刺兮雷轟而電掣坐作進退兮山搖而海沸東征
西怨若大旱之望雲霓簞食壺漿若赤子之思慈母故

其起濠潁戰滁和拔采石定京都殄強漢殲僞吳平淝
寇降魚鳧取兩廣收八閩江南壤地盡入版圖然後肆
伐中原席卷列郡下魯擊秦攻汴克晉兵震幽燕元軍
北遁僅一戎衣不血寸刃疆域至是而混一天人以之
而協應遂乃勉徇輿情金陵定鼎尊居九重君臨萬姓
大明建號以開天洪武紀元而表正於是討雲南以除
餘孽征番部以拓邊境四夷來王萬方平定所以鴻圖
大業傳萬世而無疆聖德神功冠百王而莫並此聖祖

得天下之正所以成一統之盛也猗歟休哉真人曰予
嘗誦九丘考八索訂經史驗圖籍究治亂之源求興廢
之跡惟唐虞兮三代國天下兮千百各予其民兮為君
共宗天王兮迷職猶萬水之朝東海衆星之拱北極熙
然太和是謂混一然禹跡雖廣而閩粵未通周服雖大
而遼廣未入厥後蒼姬訖錄亂從而出大小相吞強弱
為敵於是析為十二併為六七秦兮無道隋兮滅德兩
晉東西九廟南北三國偏安五代角立其間惟漢嘗一

統而侵於匈奴移於莽賊唐亦一統而離為列鎮改為
周國宋雖一統而銀夏盤踞遼金割裂得縱者失橫有
南者無北所以光霽之時常少而晦暝之時常多混一
之世每疎而分裂之世常密譬如月滿則虧日中則是
是皆本乎天運蓋不由乎人力自古一統其難如此今
先生之一統其信然邪名浮於實邪真人之言未終不
虛生勃然改容曰惡是何言也先輩謂人胷中無幾箇
國子監做不得大儒又謂人不讀書萬卷不行地萬里

看不得杜詩蓋言人必足跡廣而見聞多然後可以言
遠大而超等夷也子不見夫井底之蛙乎兀兀窮年惡
知天地之大又不見燭前之蛾乎營營終夜焉知日月
之明子為此言蓋由學問不得其傳授足跡未嘗出戶
庭無怪乎出言之不謹燭理之未精吾今語子以一統
之所以為大以開予之聾盲真人曰願安承教不虛生
曰茫茫九州勢勢八極上應天文下歷禹跡大梁玄枵
兮冀青星紀鶉尾兮揚州降婁壽星兮徐究析木姬蓂

兮幽并大火實沈兮梁豫鶉首鶉火兮雍營於是四方
之所延袤道里之所紀極霜露之所霑被日月之所出
沒寸天尺地皆入版籍此天下一統之分野也分野既
明疆域乃奠順天應天兩京畿甸鳳陽承天龍飛豹變
餘則蘇松常鎮徽池廬平揚淮和廣滁徐慶寧保和真
順廣永隆名南京以東是為浙江浙分東西嘉湖及杭
金衢嚴處寧紹台溫浙南濱海是為福建福邵興漳汀
泉延建南京西南則江西境昌饒康建撫袁臨信贛吉

九江南安及瑞由江更西湖廣一方則武昌為首漢德
荆襄長黃岳廣辰永衡常承天起聖郴靖鄖陽轉而東
南則為廣東廣州為首潮肇韶雄高雷廉惠瓊居海中
廣之又西桂柳潯寧梧田樂慶恩太鎮明泗利奉向都
龍江陵廣西之西貴州雲南則銅黎思鎮石晉寧安大
雲臨景楚廣潯沅軍民有府數莫可殫貴州西北則四
川地保馬重成順夔及敘此九藩者南方也由南以北
踰淮涉洪則河懷南汝彰衛開封是河南為天地之中

京師東南海岱蒼蒼曰濟曰兗東青登萊則是山東為
鄒魯之邦山東西北大同宣府太原平陽遼汾澤潞是
山西倚於京左京之西南西嶽巍然則西臨漢鳳慶鞏
平延是陝西鄰於四川此四藩者北方也其餘州百縣
千鄉萬里億幅負之廣不可紀極此天下一統之郡縣
也高山廣水后土是載神封作鎮以為限界故麒麟獅
子兮擁鍾山於天中龍虎鳳凰兮拱天壽於雲外祝萬
歲兮太平望諸陵兮朝拜山則天台天目日觀月精玉

筍玉溜金庭金城大邳大別太白太行崑崙匡廬賀蘭
白登麻姑天姥兮虎邱雁蕩首陽少陽兮內方西傾武
夷蒙羽兮岷嶓王屋八公三竺兮九疑四明予獨尊夫
五嶽五鎮之山兮何高大而神靈饗祀典於無窮兮出
雲雨而化生吾欲效夫尼父之登臨兮小天下於雙睛
水則五湖五溪三泖三湘七澤七渡九河九江伊洛瀍
澗兮涇渭漢沔灘沮汶泗兮沱潛衡漳大野彭澤兮雷
夏荷澤潯沱鴨綠兮巫峽滄浪弱水流沙兮滇池錢塘

黑水混同兮高郵吳淞子獨重夫四海四瀆之水兮何
源遠而流長浮天地而浴日月兮泄尾閭而濫觴吾乘
長風而破巨浪兮蓋有似乎遊聖門而望洋其他疊嶂
層峯千流萬派或崇或卑或小或大國志所書禹貢所
載莫得其詳姑述其槩此天下一統之山河也天潢衍
派玉葉流芳錫圭儋爵建國封王則秦晉周楚齊魯韓
唐遼岷代肅慶谷安湘潭伊瀋郢附以靖江載之祖訓
休矣烈光繇繇奕奕代有哲王惟我興國聖啓龍翔鄭

衛吳越蜀趙荆襄淮邨益德榮吉滕莊徽崇秀許汝壽
岐黃朝輝雍浙衡涇及梁曰裕曰景其來未央王子王
孫兮益蕃益昌郡邑分封兮甲第輝煌彼將軍兮中尉
又逸世兮延長是皆一本百榦萬蕊千枝原衍澤流靈
鍾慶滋彌布九有不數螽斯當與天地相為終始日月
並其光輝此天下一統之藩封也藩封之外遠不可悉
自粵門以南胡門以北東盡東海西踰西域則有天方
日本琉球朝鮮占城真臘亦力于闡渤泥撒馬交趾細

蘭大秦大食西洋西天一弗敵兮勿斯里三佛齊兮蘇
吉丹更有沙華國兮古麻刺弼琶囉兮忽魯謨榜葛刺
兮兀良哈吉慈尼兮默德那木蘭皮兮滿刺伽默加臘
兮茶弼沙瑣里磔里藍無里新羅暹羅弼斯羅蘇祿蘇
門兮哈烈哈密勿拔層拔兮瓜哇阿哇麻逸麻嘉兮打
網打板三苗三嶼兮百變百花獯鬻獫狁厥烏桓匈
奴鮮卑契丹先零肅慎火篩回紇吐蕃限以三衛控以
九邊畏威懷德強殞弱降梯航重譯玉帛來王此天下

一統之外夷也國之大事莫先於祀惟祖宗兮在天先
報本之誠意內奉先兮有殿外太廟兮有制盈室崇深
昭穆次敘祔禘嘗烝萬古不替赫上帝兮皇祇判高厚
兮覆載每歲孟春郊社並舉酌圜丘方澤之儀為上棟
下壇之禮父天母地兮同尊祖功宗德兮同配天子穆
穆臣工濟濟薦以玉帛泛以醴齊從祀則日月星辰風
雲雷雨社稷山川嶽鎮瀆海聖帝明王神祇太歲旗纛
先農城隍月將五祀十廟至於川嶽英靈陰陽神鬼藩

國賢王累朝英主道統真儒理學賢士名臣名官忠臣
孝子循吏高人文士烈女等而上之則自生民以來未
有盛於孔子此天下一統之祀典也萃渙之道既明輔
理之司攸定百司庶府設官分政大小相承體統不紊
故公侯兮爵崇駙伯兮榮並公孤寅亮宗人衍慶五府
兵權六部政柄法司慎刑太學儲俊詹事輔儲科道諫
諍太常之祭祀必嚴通政之出納惟允尚寶符臺翰林
史筆光祿宴饗太僕馬政中書筆翰錦衣親軍行人皇

華鴻臚朝聘內監嚴密京兆承宣上林蕃育兵馬巡警
欽天授時太醫調劑進士題黃甲之名賓客匡青宮之
正殿閣閤門清光日近兩京攸同表裏輝映外則藩臬
十三郡縣千百都司運司儒學武學留守襲封陰陽醫
術軍民府分指揮司遞運所分水馬驛至於衛所等局
監苑場司閘壩倉庫關井宮祠王府職制土官羈縻此
天下一統之官制也若夫天語聖言載道論德縹帙牙
籤手謄梓刻緯地經天汗牛盈室乃木天禁地之儲寶

壽邦永命之脈書黜異端用備鑑擇茲不登書恐誤後
學至如資世通訓祖訓條章聖政之紀述大誥之昭揚
文集浩瀚律令精詳日厯纂玉堂之祕寶訓發金匱之
藏禮制頒行於司府集禮詔及於遐邦解論語之蘊奧
正書傳之外訛孝慈錄兮仁至義盡昭鑑錄兮遠慮長
謨思親有詩教民有榜方竹有記白馬有歌雄文大製
誠與典謨相表裏協雅頌之中和此天下一統之詩書
也物產既蕃貢賦斯定秋兮有糧夏兮有稅萬困貯儲

千艘轉運採山之利既博煮海之功尤盛市廛有征鑪冶有額閑廢畜牧水陸釣弋機杼所成蠶桑所出庫藏所儲坑塲所入國用所需民生所急此天下一統之貢賦也上行下效謂之風衆心安定謂之俗六經同誦兮六軍同令五教同敷兮五刑同治車同軌而書同文屋同式而衣同製家同塾而黨同庠國同學而術同序文章同體兮行移同式丁力同役兮土田同稅作息同樂兮語言同音節令同厯兮日用同器朝覲貢舉兮同期

賞罰封拜兮同制揖讓拜跪兮同儀冠婚喪祭兮同禮
僧道巫祀尼媪兮同禁水火金木土穀兮同利律度量
衡符璽券契兮同於立信金石絲竹匏土革木兮同於
宣滯慶弔餞迎兮同於寓情宴饗餽贈兮同於將意所
以國無異政家不殊風閭無廢職野無惰農此天下一
統之風俗也都邑之宏侈宮禁之森嚴經陰緯陽象地
法天垂萬世之統緒表四海之觀瞻控海連淮江南佳
麗鬱鍾阜兮龍蟠雄石城兮虎踞浩長江兮天塹靄上

林兮春霽是南京為萬方之都會左環滄海右擁太行
南襟河濟北枕居庸瓊島春雲兮薊門煙樹太液晴波
兮玉泉垂虹是京師為萬世之家邦至於阻淮帶江連
河引泗鍾離漢名塗山禹會國家興王實鍾王氣如周
岐豳類漢豐沛是謂中都根本攸繫若夫洞諸門兮禁
城歸萬雉兮神京金門玉陞山河拱抱龍門鳳閣霄漢
光明更有景運隆宗月華日精六宮嚴謹七所紆綵親
蠶有館兮綵絲有室緝熙有殿兮觀心有亭外則百官

庶府綦布而星列千門萬戶霧湧而雲蒸此天下一統之基業也夫人之見聞有限物理無極故肩背不可以反顧鬚髮不可以縷析況天下一統其大如此豈常人所能淺近而窺測哉姑述其萬一而已真人曰然構宮室者必資公輸之巧定律呂者必賴師曠之聰故舜有五人而致治武有十亂而成功今天下所以成一統之盛者雖曰真主挺生歷數在躬然所以左右而輔翼者必有一代之英雄不虛生曰誠哉是言夫子不見夫天

降時雨山川出雲又不見夫朝陽生矣高岡鳳鳴所以
國家將興賢才彙征理則然也況我聖祖天錫勇智不
階寸土龍飛淮泗英雄萬國不期而會當是時股肱心
膂於其間者豈可以數計哉則有若中山武寧岐陽武
靜開平忠武寧河武順東甌襄武黔寧昭靖堂堂六王
功全德盛餘則胡越盛名吳江智力趙梁氣勇俞統材
識武襄僉都督副之效勞蔡公忠壯東海之戰歿黔國
巢國兩全忠赤郢國靖海並著勲績高陽耿公死節不

屈皆能佐一人以成功配六王而廟食其他攻城掠地
撫順摧強出奇宣力徇義死忠五爵分封廟祀有光澤
流子孫與國同休武功如是此天下一統之所由定也
又有若犁耜公之譚謀帷幄龍門子之文章金石開司
寇之經綸詹承旨之材識曾侍郎之議禮劉秋卿之定
律蹇蹇六臣名垂竹帛至於尊居四輔貴擢三公丞相
秉鈞侯伯分封開黃扉兮參知政事輔青宮兮贊善大
夫兵寢刑措禮備樂和居民敷典執法分符其他戚里

姻聯藩封輔導或任都邑或掌學校夷邦奉使丘園高
蹈報國死忠事親全孝存歿光榮古今輝耀文德如是
此天下一統之所由治也夫武以戡禍亂文以綏太平
一代治功相須以成良由我聖祖剛健中正寬大英明
配以聖后端一靜貞儲君有象賢之器羣僚皆屏翰之
英堯仁天覆舜德地承巍巍不與蕩蕩無名所可見者
惟功業文章卓乎煥然之可稱觀其得國遠過於唐宋
行師名正於湯武申明五常世皆復古建官革宰相之

專列爵罷子男之數去神祇之濫封改先師之像塑祭
先王以御名待亡國以賓禮家法正而兵令嚴寺人安
而戚里安至如訂先王之禮樂復前代之衣冠正韻書
之偏音除封禪之異端紀年號而不改寘符讖而不譚
無徽名尊號之稱頌無離宮別院之遊觀德政不陳於
大臣公侯不封以文職親軍不隸於五府藩王不伍於
百辟舊章不亂於聰明恤典不分於存歿兵不出於無
名姓不冒於繆錫避諱止於不偏陳言許以直入威重

典於豪強隆師道於勲戚是豈無自而然哉蓋其體道
謙沖立心恭默於昭不顯之天建用惟皇之極法文王
之卑服遵大禹之菲食本原之地純乎天德所以功高
萬古德冠百王非三代以後之君所能及也太宗奮興
燕邸為京洪熙宣德仁薰義蒸於穆睿皇丕顯重明正
統天順乾覆坤承今我皇上握赤符王火德承乾運撫
璿極皋夔左輔稷契右弼都俞吁咈贊襄密勿總萬幾
以圖治登羣賢而效職孝隆至養允惟三后之尊儲建

元良茂衍萬年之歷但見分野加詳郡縣加闢山河加壯藩封加益外夷加化官制加立祀典加崇貢賦加溢風俗加美基業加飾此成化萬億斯年之初生斯世者何以報照臨之帝力真人乃凜然而驚肅然而起北面望闕稽首再拜而言曰嗚呼盛哉先生之言博矣大矣至矣盡矣筆而成書可以為史垂之後世可以觀累朝之盛治矣

御定歷代賦彙卷三十五